وزارة الثقافة



بتشوف القمر أحسن منك

شعر

أحمدعبدالحكم



هلسلم کنابخ

تصدرها الهيئة العامة لقصور الثقافة

رنيس مجلس الإدارة
سعد عبد الرحمن
أمين عام النشر
محمد أبوالمجد
الإشراف العام
صسبحى موسى
الإشراف الفنى
د. خالد سرور

- بتشوف القمر أحسن منك
 - أحمد عبد الحكم

الهيئة العامة لقصور الثقافة القاهرة 2013م كر13 × 5ر19 سم

تصمیم انفلاف:

أحمد الجنايني

- تندقيق لغوى: جواد البابلي
 - رقم الإيداع ١٩٠٤٢/ ٢٠١٢
- ە الترقيم الدولى، 3-313-718-977-978
 - الراسلات؛

باسم / مدیر التحریر علی العنوان التالی ، ۱۵ شارع آمین سیامی - قسمسر السعسیسنی القاهرة - رقم بریدی ۱۵۶۵ ت ، ۲۹۷۲89۱ (داخلی ، ۱۵۵)

الطباعة والتنفيذ ،
 شركة الأمل للطباعة والنشر
 ت ، 23904096

7

سلسلة شهرية تعنى بنشر إبداعات الشباب

هيئة التحرير ورئيس التحرير على د. هيئة التحرير على مدير التحرير السعيد المصرى المرتير التحرير سكرتير التحرير التحرير أي ونس شعبان

الأراء الواردة هي هذا الكتاب لا تعبر بالضرورة عن توجه الهيئة بل تعبر عن رأى وتوجه المؤلف هي المقام الأول.

- حقوق النشر والطباعة محفوظة للهيئة العامة لقصور الثقافة. • يحظر إعادة النشر أو النسخ أو الاقتباس بأية صورة إلا بإذن
- كتابى من الهيئة العامة لقصور الثقافة، أو بالإشارة إلى المسدر.

بتشوف القمرأحسن منك

إهــداء

إلى ثورة ٢٥ يناير ودماء شهدائها تاريخ جديد وحروف أخرى لم تكتب بعد ١١

أحمد عبد الحكم

وشوش بتلبس ف روحی .. وتسكن حروفی

ميت م الضحك

خليل أبو جريو أنور خطاب بينيه أبو الحاج إمباركه وحسين محمود فاطنه عبد الله وسعيده إبراهيم جميزة الجامع حريزة الجامع كل ما باشتاق لى أطلعهم من جوايا أتأمل فيهم

وأبكي بحرقه ع الولد الطالع وسطيهم (في الصورة) ميت م الضحك! 10

نخلايةالبير

بیراود شاشة حلمی
مع إنه وقت ما مات
کنت یا دوب خشیت فی الدنیا
جدی اللی عرفته من حکایات الناس
من صوره متعلقه فی البرواز
علی حیطة مندرة العیله
من ریحة بیتنا البنی
فی الزمن المنسی
من تقاطیع وش أبویا
و حبه وقفطان

على شماعه قديمه ف بيتنا وأكتر ما عرفني بجدي كانت نخلاية البير زی ما کنا نسمیها زمان کان جدی زرعها ف طرح سنين الفيضان ولحد الآن لسه بنفطر ببلحها ف رمضان بلحتها أجمل بلحة ف كل النخلات حكايات كنت أتباهى بيها زى ما كنت أتباهى بجدى وجدى اللي عرفته من حكايات الناس كان عمدة أهل بلدنا جبروته كان في الحق قد ما خاف الخالق عمره ما هاب الخلق يفصل في قضايا حدود الأرض ويزعق صوته في المعووج زعقه تخوف أجدعها كبير وف جنى القطن أو لمّ السمسم

أو وقت حصاد القمح تلاقيه متربع وسط الغيط بيهاتي في الأنفار لاجل يشدوا الحيل يباشر كل كبيره وصغيره ويحوط في الزرعايه بقرايته للقرآن جدی کان حافظ ومحافظ ع الفرض جدى كان عاشق للأرض يرعى جرنه بنفسه مع انه العمده كان ناصب في الدوار فلكه للحرامية حتى العفاريت - إتهيأ للناس -إنها بتخاف من هيبة جدى!! أنا كنت صغير وقت ما مات لكن شفته ف وش الناس وقت ما كانوا بيقروله «الفاتحة» شفته ف حسرة وش أبويا وأنا تايه بين زرعتنا وزرعة جارنا!

شفته ف لتنا زمااان شفته ف نخلاية البير اللي زرعها ف طرح سنين الفيضان و لحد الآن لسه بنفطر ببلحها ف رمضان!!

أبويا

ورد الخير والنور والندى على أوراق طفولتنا الخضرا محبة آل البيت والدراويش مفتتح الحضره وتجلّى دعوات الفجريه يارب. والادى ضيّ الله حيّ الله حيّ الله حيّ الله عيّ الله عين الله

احفظهم م الفتن الفتانه والدنيا الفانيه المليانه بالكدب وبالغيّ الله حيّ الله حيّ وحياتك يا أبويا

تدعى لى أنجح روح ذاكر يا ابن ال يارب يا ابن البناد في الرزق الجاى بارك في الرزق الجاى الله حيّ.

أبويا..
ساحة الأوليا
اللى بتمدح فى رسول الله
قلبى مش ليك ولا ليّا
قلبى ليك الله
قلبى لحبيب الله
مين غيره حيعشق.

أبويا . . اللي بتتفك مفاصلي 16

لما بيزعق وعمر إيديه ما اتمدت وضربنى ولا عمره فرق في مشاعره بينى وبين أخواتى.

أبويا.. جنينه مليانه بفل بينام آخر الليل على خواتيم سورة «البقرة» و«تبارك» و«يس» ويقضي الوقت الباقي في السهره بالسبحه التسعه والتسعين في التسابيح والتكبير والصلاع الزين نومنی یا رب ومافيشي ف قلبي ولا شعراية غل يمكن علشان ما هو أبويا أنا شايفه كده لكن ليه من عشرين سنه ولدلوقتي؟ كل ما باشتم على واحد قدامه بيقول لى ما لناش دعوه بحد أو يعمل نايم ومايسمعش ولو زودت يحرق لي سابع جد

> أبويا.. اللى سحابة الميه البيضا اتزرعت في عنيه الاتنين ولكنى دايما وأنا قدامه باشوفه شايفني شايف فرحى وحزني وحيرتي وساعات خلبصتى لكن 18

لما بانام وما اصلیش العصر بیقول لی فینك أنا مش شایفك قدامی

وأما الحزن يخربش فيا وأشوف الدنيا بيبان مسدوده وليالى نعش وعدوده باكون مشتاق قوى لأبويا لأبويا أتوضى لى!!

شافت أبوها في المنام

بعد ۲۲ سنه شافت أبوها في المنام أمي اللي شايله ف قلبها سربين حمام بيعششوا على سقف بيتنا المبنى من قهر الحيطان ويوقفوا برد الشتا ف نقطة دفا ولحظة أمان على وشها خيوط الشقا شابكه في خيوط الحنان شابكه في خيوط الحنان

زى كل الأمهات اللي ف بلدنا قلبها فرن الخبيز بهجتها رغفانها الشهيه زى كل الأمهات اللي ف بلدنا عيونها دنيا بالفصول الأربعة متربعه ف قلب البيوت - حدوته يا أمه من حواديتك زمان - كبرت بطّل لعب قوم ودى الطحين أنام على حجرها أدلع قوى أصغر قوى تضحك لى هيّ بالقوى وتخش بيا دنية الحواديت النهارده الصبح بدرى والليل بيقلع هدمته صحتنى من غفلة منامى ف عنيها فرحه ما شفتهاش غير يوم نجاحى ويوم جوازات البنات قالت لی شفت أبویا فی المنام ضحکت أنا بعد ۲۲ سنه یا أما ردت قوام وإزای کنت أشوفه بس یا ولیدی

أنا اللى كنت بانام ما باحلمشى غير بوش الفرن لل يكون عندى خبيز وخبزة عيش ما تفضحنيش لما ييجى ضيف عزيز وعمرى ما نمت ف عياكم الم الآهه من شفايفكم النعسانه أحطها ف صدرى اللى واجعنى وناقصنى أخش الامتحانات بدل منكم!! لما باشوف الأسئله فى الحلم بس يا خسارة ما باعرفش أفك الخط

وبنظرة فيها من حنانها

من طيبتها ومن ألمها قالت لى برضه أديني عشت وشفت أبويا في المنام!!

العصايا شايله ريحتك

إلى الشيخ عبد الحكم

لسه أنفاسك مناسك لسه أذكارك مسك في الأوضه بينده الرياحين لسه عيونك دفيانين واليمام مرشوش ف قلبك ورد من أول تبارك بهجه وصول سورة «يس» وصف الحبيب المصطفى والدفا بالقعده بين الطيبين لسه ابتسامتك على شفتك والجسم دافي راسك على كتافي والبروده لأطرافي

ريحة بخور صافي ولسه ما صدقتش لسه شايفك صاحى بتهزنى بالذكر والتسابيح والشكر للمولى ع القليل - الكتير لولا الرضالم يكون لسه شايفك کون قلہی لما یضیق ياخد براح اللون من خيوط بهجتك لسه باشوف الفجر ف عيونك وباتوضى له وكأنى سامع عتابك إمتى ح أفضى له قدامي واقف تمدح أفضاله قدامي طاقيتك وجلابيتك والفراغ مليان عافيتك لسه متربع ف بيتك

العصایا شایله ریحتك قلبی متعکز علیها والدموع مش راضیه تطلع ایزای ح تطلع ایا وانت فی الصاله بتقرا ضحکتك علی خد بکره وبکره لسه بیبتدی بکره لسه بیبتدی لسه بیبتدی لسه بیبتدی بیبتدی

إبراهيم أبوشريكو

بعلبة دخان
وشوية سكر
وورقتين شاى
مكن يزرع لك فدان
وهو ما يملكش
غير قيراطين طيبه
وتقاوى ريحان
بيفوح من صدره
المنفوخ بالناى
دراعاته فرع كافور مليان
وشه الأسمر

زی بخور هندی رجليه الحافيه تدوس ع الشوك وتخليه نعمان ده عمك براهيم أبو شريكو وشريكو يعنى شريكك مش بس ف زرعة غيطك ده بیقاسمك وقت الفرح ووقت الحزن تلاقيه جنبك ف ولادة مرتك أول واحد جالك في طهور أنجالك يتلقّى العزا قبلك ' في جنازة عمك أو خالك قلبه فدان قمح وشه السَّمَّح سنابل قمح لو كل اللي معاه جنيهين يشترى بالنص هريسه والباقى لبان يلم الأطفال حواليه

ويفرق كل اللي معاه ويغنى يضحك ويغنى الزمن الطيب راجع يا ولاد الفرطوس! زمن الشيخ عبد الراضى والعمده أمين على حامد والحاجه تقيه سعيده وفاطنه والشيخ عثمان الناس اللي اتغرسوا في الطين كرم نخيل خيل بتشيل على ضهرها حزم الخير الزمن الطيب راجع ح يهد بيوت الأسمنت ويبنى كام برج حمام راجع يعدل في الدرابيس ويسوى الأرض ويداوى غيطان القصب المليانه ديدان

الزمن الطيب راجع نورج وشادوف جرن معبّى بالغله وقله بتروى الجوف الزمن الطيب راجع الزمن الطيب راجع

عمده بتختاره الناس عمده مش خواف مش متعين م الدوله بكام لحلوح! وعبايه صوف الزمن الطيب فين يا شريكو؟ الزمن الطيب غاطس ف النيل إمتى يقب؟ لما يشوف ف وشوشكم حب لما جنينة الجلود تطرح مانجه مش لموّن لما فدان القمح يجيب خمسين أردب لما بيبان البيت تفتح قدام الضيف

لما الصيف يرجع مكسور الخاطر قدام القله اللي بتروى العطشان الزمن الطيب راجع راجع راجع يا ولاد الفرطوس !!!

الحاجة تقية

شفتها فی الحلم إمبارح
کانت راجعه من الحج
رغم إنها من سنه فاتت ماتت
النور ف عنيها كان بيوج
خيول بتسابق بعض ف روحی
فرسان بترج البدن المهتز
وصهيل بيطبب لی جروحی
حواليها كان زوار ياما
عمات وعمام
الكل بيحمد ليها سلامه
زی ما كان

باين في عنيها العز دى الحاجه تقية كبيره عيلة آب سالمان الوتد المغروس ف حشانا حنيه ورغيف بغموس ف حلوقنا الأنشف م النشوفيه أما تتلم العيله حواليها عمرها ما تسافر بيهم بكره ولا تقعد وياهم دلوقتي كانت تفتح بوابة الذكري تطلع من قلبها أشياء تشبه حواديت الغيط .. الخير الغله .. الفيض النيل .. النيل والبستان الجرن المليان والرغفان ال كانت رغفان أول طوبه شالها جدى وقت بناية البيت وتعدى بينا بحور وبحور

أشواق القلب تفور وتفور تنصب الذكرى من براد حواديتها المسحور ننسى من سحر إمبارح بكره وأنا من طول قعدتى وياها

عرفت إزاى يعنى عينين تحضن إنسان وإزاى يتلم الضي الهربان ف نظره حنان والشتا يتربع دفيان في الجسد الدهبان الحاجه تقية اللي من سنه فاتت ماتت جاتني في الحلم إمبارح يمكن علشان تعاتبني إكمني ماكتبتش أرثى مماتها أنا ياللي ورثي حروفها وحواديتها الحاجه تقية جاتني

علشان تملا قلمی الفاضی من حجر دوایه مدادیتها وحنیتها و تخطی عتبة قصیدتها

جمرة قلب بره الأوطان

صوتك في التليفون عصافير مدبوحه ومراكب راسيه على ضفة حزنك يا أبو قلب حنين جناحاتك مش حمل الطيران ريشك هش طاير ليه؟ طاير ليه؟ عارف جيبك مخروم! عارف جيبك مخروم! عمر ما قلب حنين

اتوافق مع جيب مليان بتقضى شتاك بردان علشان يتدفى البيت ملعون أبو خاش الدفايه اللي بتنقاد من جمرة قلب .. بره الأوطان ملعونه الجوابات اللي بتوصل ناقصه صاحبها ملعون العرق النازل يعزف لحن من الألحان مكسور ملعون القرش اللي بيسقف طبلة ودن بتعشق فيروز ونجاة عارف إنه حلال لكن مش يبقى حرام لما يفضي الروح من زحمة زقزقة العصافير لما يكسّر فوانيس الشارع ويفضيه حتى من يفط الحلم لما بيحبس ف زنازن قهره غناك صوتك كداب وانت بتقول مرتاح شایف حرفك محشى آهات

الضحك الطالع منك بالعافيه بيعبى روحى جراح انزف . . إنزفني الدم الطالع منك محنى ماشى في الشارع بيزك مش لاقى عكاز والشارع فاضي حتى من لمض الجاز الدم الطالع منى جافى مش قادر يوصلك أحسن لى وأحسن لك ارجع قبل جراحة تجميل الوش ما تجمد قلبك قبل ما أنساك وأفتكرك بالقرش الحزن مراسى الفقرا خليك على مركب من دول جدف وحدك وتعال صدقني ح أركب وياك على مركب حزنك وافرح بلقاك!

حصان الحلم مرمحش

كل ده كان حلمك
وماقدرتش تكمل
عبيت صدرك هوا
وغميت عنيك
عديت بموتك ع الشجر
سقطت حروفك كلها
من بين ايديك
هوه اللي كان نازل مطر
واللا دموع ملايكه
غزلت مغازل حزنها ف قلب القمر
شقته نصين

شق الصراخ وسط الفضا شقق حيطان الليل رقصت عصافير الألم على طرف عدوده روح الوطن راحت ف حدوته راحت آهاتك واللا سبتها ف ريقنا الموت على طول يضايقنا وما كانش بيضايقك غير موات الناس وضحكتهم الهبله عبيت في صدرك ماس وغنيت غنوتك للبحر ما راحتش رماك الموج على الرمله وكنت جريح وصدرك ميت عاندت الريح وعديت ركبت حصان الحلم مرمحش لأنه ما حلمش زی انت ما حلمت مارحش بعيد ليوم فرحك جنب عروستك البيضاف ليلة عيد وكنت بتضحك على حلم عبيط

لكن عاجبك عجيب الموت في وسط الغيط بيكتم طلة الضحكه تفرغ الحدوته نرسم ف قلب التوته أول موته ما نلحقش غنوتك خدتها ف صدرك وسبت حروف وصوت مخنوق على التليفون واقف على ودانى بيقطر دم وبقجة هم وقلب حديد لكن موجوع وصدر يضيق بضيق الكون ولما يبتدى يفتح جناين ورده ويفتح يكون على طول ماهوش راجع

بتشوف القمرأحسن منك

البنت دعاء
بتشوف القمر أحسن منى
لما بتسألنى عن وقت طلوعه
وتلاقى سكاتى
تضحك بالصوت العالى
على صغر خيالى
وخيال الشعرا
وتقوللى
إزاى القمر المحطوط
على صدر قصيدتك
على صدر قصيدتك

وإزاى قلبك ما اتوضاش بعصيره الفضى؟ البنت دعاء تملك قلب ف وسع سماها البكر قلبها متعبى دعوات أم حنون

> صبح بيطلع مجنون للنور وعنيها المقفوله بوابة سر بستان متسور بالضلمه على جواه المتعطر بزهور البنت دعاء في ليالي الصيف المعقوده بلمتنا على سطح البيت تحدف راسها لفوق وعنيها قبالي وتغنى للقمر الطالع القمر المتخبى عن كل عيونا المفتوحه وعيوني وبصوتها العالى تضحك على صغر خيالي

وخيال الشعرا وتقوللي البنت دعاء بتشوف القمر أحسن منك!

تسنيسم

فى اللحظة دى وانا بارتب ف أوراقى وأرص القصايد جنب بعضيها ف ديوانى تيجى "تسنيم " من بعيد قرص شمس ف ليل غميق جايّه شايله الصبح ليا بين يديها بين يديها الفرحه طازه يبقى إيه طعم الكتابه فى ليل طويل ملهوش عازه فى ليل طويل ملهوش عازه

ليل ما يعرفش السعاده إلا بعيونك يا بنتي

جايّه "تسنيم" من بعيد جايبه موجه لبحر ساكن جايبه ضحكه لوش داكن وش شاب الشعر فيه جايّه تلحق آخر قصيده في الديوان قبل ما تخش الحروف المطبعه وتدور تروس ويدوس غلافي ع الورق جايه بعيونها البريئه ضحكة في العنوان

مين اللي قال الحلم متأجل؟ مين اللي قال الفرحه غابت کام سنه؟ ما حصلش حاجه وضحكتك سرقت 52

زمن الكآبه وكإنك انتى قبل ما عيونى تغفّل قلتى يااللا اكتبنى فى الصفحه دى هى مبعوته من ربك هديه !!!

وبكل ضعفى اتسندت عليكي

عنيكى زقزقات عصافير فى صدر جنيه عاند شعورها البحر ورماها جوا عيون صياد الطعم طعم الألم والريق ما يجرى والريق ما يجرى الشمس نقحت فى الرصيف الشمس نقحت فى الرصيف بتغازل الحافى قلبى قمر صافى ما بيشبهش أوصافى

وانتى عيونك أمهات اليتامني ف وقفة الأعياد لما وقفتي جنب الضل طرح الشجر ألوان رجع الخريف للخلف واتوضى من طرحك ملوك الجان أبيض يا لون وشك النيل سكن عشك حالف ما ح يغشك وإن جف يوم نبعك حيعبى من ريقك يا مبتدا ورد المريد وسجادة صلاة الولى وسبحة المختشى م الذنب والعصيان حنيتي ضرع السما حلبت مطر رقصت عريان البدن وسفكت دمى فى الحلال زرت روحى بالغنا

يا شمس يا نبيه ما تكفريش بالميه قبل اندماج البدن فى ارتعاشة البرد يا شبيه يا صبيه

صُبى أباريق الدفا ف عنيا واتمرمغى في القلب فتحت عيني لقيتك قدام مراية الحلم واقفة بتتعايقي وتزوقى روحك فراشه بتستحمي ف ضي وتسلم نفسها لشهوة المصابيح فتحت عيني لقيتك بتقربي مني بوستيني ف عيوني صابني الخجل منك وبكل ضعفى اتسندت علیکی وحلمت ویاکی.

يتبل ريق المراكب ... وأنطفى

آخر عروسة نيل في قلبي
بتسحب حلمها بشويش
ما عاتبتهاش
لأني عارف قد إيه النيل صبر
سابني أعافر كام سنه
أطلع سبع سموات من الفرح اللذيذ
واطرح مع النخل العزيز
سبايط غنا
وقبل ما تطيب فرحتي
سحب عروسة نيلي وقطفني

بتفرد شال العمر في النظره الأخيره ترمیه علی صدری و داع يشهق نشيد الشمس ويطيش الشعاع

> تنطمس ملامح روحي ويشيط المدى ــسعنى البكا يتبّل ريق المراكب. ، وانطفى . 60

قلبى بيكره المشرط

ما احتملش قلبها يسمع قصيدة لشاعر اسمه (خالد محمود) عن أمه اللى ماتت ولحظة غسلها قالت كفايه وجريت من الأوضه بعد ما سابت ع الخده دمعتين سخنين عبير كده من صغرها عبير كده من صغرها شايله ف ضلوعها قلب شابك فتحته بالناس ومُصر رغم الوجع ومُصر رغم الوجع

وف عز زحمة الأحزان بتشيل قلبها العصفور على صينيه من الفضه وتوزعه بإخلاص

يمسح بالزقزقه دمعه ويبنى عش من ريشه لجلن لما يتألم وتقرصه الأحزان يكون وحده وف عز ما كنا نتسامر أضحك وأسألها عن عريسها الجاى ف الأحلام بمنتهى الخجل مني تقول عايزاه يكون إنسان أقول لها إزاى تبص لی بحیره وتطلع جرى م الأوضه زى عادتها 62

سایبه ع المخده
دمعتین سخنین
عبیر آخر سنه فی الطب
قالت لی حاقولك سر
ما تقولهوش!!
قلبی بیكره المشرط
فضفضت أكتر
وبیكره البنج فی المستشفی
عشان بیحرمنا
من وش الملایكه
من وش الملایكه
لما نیجی نموت!!

حواديت وطن بيعلن حزنه فحروفي

جلا ... جلا

حاشا وكلا أنا مش من الحاشيه ولا كنت يوم إمّعه ولا كنت منحلا ولا كنت منحلا عير بس للمولى غير بس للمولى لفيت حوارى البلد غوطت في الوحله شافني الوطن حاير فاتنى بلا حول ما نابني غير الوجع

ف نهاية الرحله لفيت مع الدراويش وذكرت في الحضره طولت في الأدعيه وتهت في القبله

دخلت بيت الأفاعي طلع البدن بكام لدغه لكنى كنت الرفاعي لابس الزعبوط مع الشمله! وما نابني غير الوجع ف نهاية الرحله غلبت كل التلامذه ف حصة الإنشا لكنى بغرابه سقطت في الإملا لما زوقت الحروف وسندت قلبي الضعيف بين النقطه والفصله ودخلت وسط الصفوف أنادى بمظاهره

لقيتني فجأه ف لومان وبالعب الحجله

فرجه لوشوش متكدره وكحله وما نابني غير الوجع ف نهاية الرحله ضيعت كبشة سنين في الغرام الذي ولي جبت النياق الحمر لكن زحمة المولد ضيعت عبله حاربت جيش الأعادي بالفاسه والنبله كنت مكشوف الغطا والحلم في ليل الشتا أحلى وبكل ما عندى من عناد احتملت وقت البلا بلا خوف بلا دلدله إنما بضحكه بتعلا حتى وقت البهدله

بحته مقطوعه والحلم متخبى ف صندره جلا جلا قلبى انجلى أنا الإمام المبتلى بالفقر قبل الغلا بالموت قبل الغرغره بالضحكه في وقت البلا أنا الإمام المبتلى حتى لو فاتتنى ركعه قلبى سجاده صلا. 70

بغداد

النخل طاطا فی العراق انکسرت نفوس الخلق فی الموصل النیل بیوصل دجله بالعافیه والفرات - بلا قافیه - بیمسی ع المسیسبی قلمك وقع ع الأرض یا متنبی لبی الندا لبی واکتب لبوش الدوه واکتب لبوش الدوه وصله مدح بالصربی وصله مدح بالصربی واللیل فضاح اللی متخبی واللیل فضاح اللی متخبی واللیل فضاح اللی متخبی

والبصره بتلف البلاد مقلوبه ع (الدونكى) قلمك وقع ع الأرض يا متنبى طمطم وطنطن وادى التحيه وانت متسلطن

سلام مربع یا صاحبی للی استطاعوا بمعلمه وبفهلوه بالمسطره والمنقله فی قلب واشنطن یزرعوا بغداد.

وللعرب العزا

يا اللى غاويين البكا يا اللى عاشقين النواح يا مزروعين فى العدم يا مقلوعين م الغنا أعضاء شهيد للبيع م الرأس حتى القدم المجد ليهوذا وللعرب العزا آدى الشهيد اللى انقتل فى جمارك الأعضاء بيتهرب قطع إيدين وقلب ولسان

رجلين ودم وبنان آدى لسانه اللي تلي بعض آيات الكتاب م الفاتحه والفتح ثم الواقعه صلى وسلم ع النبي وكمان قرا بعض أبيات القصيد للبحترى والأصمعي والنابغه والسيره لذات الهمه والشرقاوى لادهم وأبو الفوارس عنتره المجد ليهوذا وللعرب العزا يا اللي غاويين البكا آدى الشهيد اللي انقتل فاتح شهيه للبكا وآدى الإيدين اللي جرت في عروقها غزوات الصحابه حمزه وطلحه والزبير ابن الوليد والفارسي سلمان ومصعب بن عمير إيدين رفعت رايات الكرامه في حرب اليمامه

واتقطعت ع الضفه ف فلسطين المجد ليهوذا وللعرب العزا وآدى القدم صمدت ف وش الطوفان ف وش الرصاصه والباروده ودبابات الأمريكان يا دى القدم صمدت عشان ما ينزلش العلم المجد ليهوذا وللعرب العزا وآدى القليب اللي احتوى قصص البطوله والفدا نبل الفوارس والحكم يا دى القليب اللي ارتوى عشق الوطن لا عمره ضل ولا هوى المجد ليهوذا وللعرب العزا يا راكعين . . يا ساجدين مش مكسوفين تنسألوا في زحام القيامه عن لسان بعد ما صلى ع النبى

قلعوا حاخام أو إيدين في ليلة الإسرا دعوا اتقطعوا

واستخدموهم أعضاء بديله لإبراهام ولبنيامين الأفعوان يا راكعين . . يا ساجدين تفتكروا لوحتقابلوا في الجنة النبي راح يبتسم بعد ما بعتم صلاح وآذان بلال وأفئدة الرجال وحى على الكفاح يا راكعين . . يا ساجدين ما تصلوش على نعش الشهيد صلوا عليكم أولا واقبلوا فيكوا العزا.

بورنوببلاش

«ماحدث في سجن أبو غريب وما نشرته الصحف»

شوف المناظر والصور بورنو ببلاش والفرجة ليك - عليك يا غبى هدوم بنات العرب متعلقه على شماعات الأمريكان على شماعات الأمريكان ديدان بتسرح في بدن عريان غربان بتبنى عشوش الشهوه ع الشجر الحلال ع الشجر الحلال سوس مجوس بيمص في عروق ورق الهوى العذرى

مشهد حقيقي واللا نصه خيال ملاك على الأرض مسه شيطان مشهد حقيقي واللاكله خيال خسته بتكتم ريحة العفه مافيش مراكبي يعدل الدفه فى بحر هايج مالوش شطآن شوف المناظر والصور بورنو ببلاش یا متفرج غبی بنت عريانة بتصرخ وا.... ولأ معتصم يسمع نداها يرد الآه تتحط إيد النجاسه حروف تدارى الشرف وتدوس على المصحف كان عمرها لسه ورده بتنشق سورة النور رحيق العفة في القرآن تصب عطر الحبه حبه على صفصاف البدن

حروف مريم وحبه من يوسف كان عمرها لسه ورده بتتنشق هوا الرحمن كل الورود نزفت دمها العربي كل الورود كتبت نعيها على الجدران بنت من أمة محمد بنت لخديجه وعائشه وفاطمه البتول دمعه ف عيون الرسول بنت من أمة محمد صفحه في جورنان زى السطور عريانه زى الورق دايب زى الشتا بردان شوف المناظر والصور بورنو ببلاش والفرجه ليك - عليك

مين اللي بكمي النبي غير عنيك الكدابين وجسمك المتغطى بالتوت الحرام الليلادي افرد غطاك واتدفى واما البنات تنكسر اغرس الصبار على قبر أوطانك طول ما السكات غيتك ورعشة الخوف نشوتك وعيونك مشربيه غطى ف بناتك قد ما تغطى أيام وحتعدى سجن أبو غريب ح يبقى القناطر وابقى لو شاطر اتفرج ساعتها بلاش (وقفة أخيرة) شرف العروبه نزف دم في سجون العراق وبطون بنات العرب شالت نجاسة كلاب الروم بأمر م القيصر

فرمان الخليفه سكوت لحد الأزمه ما تعدى يا طفل لسه ما جاش نفسى أشوف قبل موتى عنيك زی عینی تبات تبكى كل ليله هوان ولا شواظ من نار ف قلب تتار نفسى أشوف قلبك زى قلبى عليل ولا دقته حصان عربى أصيل يا طفل لسه ما جاش نفسى أشوف قبل موتى إيديك ح تقفل ستارة عجزنا العربي واللاح تفتح جرح من تاني يا وردة نزفت في الأصيل عيون العروبه ذليله وعيوني مش بستان

عيوني يادوب توب دبلان كفن ليكي وأنا أنا لسه متفرج غبى ! 82

خالص أحزاني

المشهد مش ناقص كحل عنيكى السود ينزف على ورد خدودك واللا عصفور اللوحه ينقط دم من نغزة ريشة الحلم واللا واحد بيبيع الوهم في غنوه عن خضرة دنيا العشاق واللا راديو على قهوه بيعلن عن خفض الأسعار النار فيما عدا أدوية القلب

والسكر والضغط والأشواق والحب والرئه والرأى الحر وسرير المستشفى المر وشريط الأخبار اللي بيسرق أحلى ما فينا ويمر المشهد مش ناقص إعدام صدام وصدام الحضارات ع النووى والجزر المعزوله وأطماع الغوله في بواقي الأرض العربيه المشهد مش ناقص القطه اللي بتاكل في عيالها وتلملم أذيالها بذال الذل لسيدها اللي مستتها بفيونكات ومحنيها بدم اخواتها البعدا التعسا والأموات

المشهد مش ناقص طوابير العيش والأنابيب ولا نومة أهل الجيش في الكانتين وسلاح الجو السلاطين ومناورة بوجى وطمطم والفوازير وبيان لوزير القطر بالقبض على المختل المتسبب ف حريق القطر وغرق العباره المشهد مش ناقص ليل يحبى على الجدران ويقدم قمره قربان للفراعين ولا ناقص عين الحراس الحمرا للمساجين وطلبة الجامعه وخطيب الجمعه وخطاوى أبناء الشهدا والمعنى اللي ف بطن الشعرا الجوعي والمساكين

المشهد مش ناقص ثوره ولا ميّت في مظاهره ولا راجع م الغربه ف نعش المشهد مش ناقص

حرامية الأقوات
ولا قوات حفظ سلام المستسلم
ولا غش تاريخ الوطن الأكبر
المطروح من كتب الجغرافيا
والممحى من الأطلس
والساكن
في الهامش والفهرس
والمنزوع الصفحات
والبطولات
المشهد مش ناقص
وكفايه علينا يا حبيبتي
الورق الأبيض في الجوابات
مع خالص أحزاني.

الصوره وخلفية الصوره

(مهداه إلى الشهيد محمد الدرم)

(الصوره)

(1)

إيه يعنى محمد لما يموت لما الليل يهزم فينا يوماتى لما حلمنا يتقرفص ف تابوت ونايات الروح تتعبى سكوت إيه يعنى قصيده لمحمود درويش أغنيه لفيروز .. ونشيد الجيش إيه يعنى أفلامك يا شاهين الأرض .. جميله بو حريد .. وصلاح الدين إيه يعنى قصايدك يا جاهين

ع الوطن . . الأرض . . الطين إيه معنى كلمة حطين إيه يعنى دروس العربي وحصص الدين إيه يعنى خريطه وكتاب والسيره الشعبيه لأبو زيد ودياب وتاريخ الخيل العربيه ف أول باب إيه يعنى وقت ما شوفتيه بيموت شقيتي هدومك نصين إيه يعنى مكتوب على صدرك بالدم فلسطين إيه معنى نغرس ف زتون يطرح موتك يا محمد.

(Y)

فصيلة دمك إيه يا حبيبي يمكن نلحق آخر دقه ف قلبك آخر حرف على لسانك آخر همسه ف روحك مش قادریا بلادی یا سمرا أفدیکی ومحمد متعبى دمه ف أراضيكي مش ممكن الساكن جوانا مش بيبين عرق ندس ف جواه المحقن أحسن أحسن الدم ملوث بالتطبيع! مش قادريا بلادى يا سمرا أفديكى ومحمد متصفى دمه ف أراضيكى.

(\mathfrak{\pi})

إيه يعنى شاشه بتعرض موتك إيه يعنى نمد إيدينا فى فراغ الأوضه كأننا حنحوش الطلقات من على صدرك بالنيات آخر قدرتنا نتغطى عليك ونبات والصبح المنظر يبقى تاريخ حدوته من الحواديت زى خرايط عصر الفتوحات إيه يعنى كل حروفنا العربيه مش لاحقه محمد ف القدس مش لاقيه معنى للحمد لل يموت.

(هامش مش أخير)

ما تخافش يا جمال الدره حنغنى ف عيد الأطفال لمحمد أغنيه تتغنى ف كل بلاد العرب الأبطال!!

(خلفية المسررة)

حفلة سته لتسعه فيلم جديد لهنيدي يموّت م الضحك

اتنین حبیبه علی کوبری قصر النیل شفایفهم ملزوقه ف شفایف بعض

ورغيف طعميه ملفوف

فى قصيده محمود درويش ع القدس

قهوه بتشغل أفلام الجنس

واتنين جواها بيتخانقوا

يك / جوهار

لأ شيش / بيش

يا قلوب الناس الهيش

محمد لسه هناك بيموت

لسه هنااااااااك

بى .. موووووووت

الغلاب

ومقام سيدنا المصطفى إحنا الغلابه فى الوطن يشهد علينا الليل اللى أطول من نيل البلاد بإننا إحنا الغلابه سألنا عن أقربها جامع للصلا وما صليناش علشان الإمام أصلاً ما جاش وحلفنا ورحمة أمنا ما يؤمنا غير اللى يقرا كل آيات الجهاد ويصلى بينا على النبى

إحنا الغلابه ما تنسناش في زحمة العيد الصغير افتكرنا بتوب قماش يستر ما فينا من غرام هذا الوطن اللي اتنسج على لحمنا كرابيج حرسنا المؤلمه كان قصدها تخوف أجدعها راجل مننا وتلمنا ما اتلمناش ودخلنا حانة عم حنا نفخنا ف صدورنا الأونطه وقلنا هات من أولها كاس بكينا وافتكرنا شهيد بلدنا وكام شهيد غنينا غنوه عن البلاد طار نافوخنا ف عز خوفنا نسينا كام ألفين شهيد ومقام سيدنا المصطفى إحنا الغلابه في الوطن

دخلنا ساحة الدراويش وميلنا البدن وميلنا البدن وتهنا بروحنا ف براح ربنا الله أنت المعين وعون الغلابه مراد العباد

فى ساحة الدراويش مافيش إلا الأوليا والأتقيا والأتقيا ثم الغلابه اللى غلبهم عشق الوطن ملعون أبو اللى بموت فقير فيك يا وطن ويرقعوله زينا توب الكفن!!

روبابيكيا

روبابيكيا
هدوم ولادك وهموم بلادك
وبواقى حلم ومكتبه
وقصيده ناقصه
وقصه من قصص الشعوب الخلصه
ونشيد بلادى بدم واحد م الوطن
وخريطه للوطن الكبير
من غير حواجز أو حدود
وسيوف بتحكى تاريخ جدود
ورفوف هدوم لبس الجنود
عملات قديمه وأنتيكات

صور الزعيم في الألبومات طبعه قديمه لألف ليله وحكايات السندباد روبابيكيا الغاوى ينقط بالدم والسعر أرخص م التراب انت بتبيع والشارى مين ولحد فين حدك مين اللي ح يردك ويردلك بصرك - بصيرتك ريحة قميص يوسف راحت وقت النسيم ما اتباع وانت انطفيت لما ارتضيت تنباع روبابيكيا بيع واملا جيوبك لعب العيال في العيد عروسه ملفوفه بعلم وحصان بيصهل ألم ووشوش آخر الفرسان كلها بقروش 96

بيع واملا جيوبك
مناديل دموع الأمهات
غطت وشوش الميتين
با مين يشوف يقرا «يس»
يا مين يرد الروح

لعناقید السکات
بیع واملا جیوبك
یاما فی جرابك یا حاوی
الفرجه للغاوی
والشاری مین
آه ... یا وطن
کسرة قلیبك ع الیتامی
والأرامل
والندامه
والندامه
ع اللی بایعین البلاد

أنا في الميدان وانت مش بره

«إلى مصرالتي قامت بثورة ٢٥ يناير»

(1)

بتدور على مصر نفسك تسلم عليها تاخدها في حضنك تتلم عليها تحب ف إيديها وتقولها واحشاني نفسك تصلى معاها الفجر مصر مش ح تبان من الشباك ولاح تشوفها ع الشاشه ولا قصاصه ولا مانشيت ف الجورنان مصر متشاله ف وسط الميدان

على كتوف ولاد جدعان ولادها الصح بتتوضى عصير الصبح وتبعت نشيد الثوره للأوطان

(Y)

كنت فاكر خيولك ح تدهسني فاكرنى ح أرمى الدرع واستسلم يبقى ما تعرفنيش ولا عمرك ح تتعلم فاكرنى أعزل والخيول ح ترهبني. أنا كنت باغزل ف اليفط نصرى شايل مصرف عيوني وباتغزل مين اللي فينا حبيبك اللي قصقص جناحك وفي القفص حبسك واللا اللي طار بيكي مين اللي فينا حبيبك اللي حط ف عنيكي الغمص

واللا اللي غسل وشك ووضاكي

(\mathred)

أنا ف الميدان غنوتك وبره الميدان صوتك كل الحواجز ورق والحجاره مش ح تقسى عليا هو اللي سرق صورتك يقدر يغمى عنيا؟!

(£)

أنا ف الميدان باكتب
وبامضى على شعرى
سن القلم فوق بياض الورق يجرى
ماعادش فيه سطر مش سطرى
كل السطور رقصتها من حبرى
وداويتى من دمى
اللى سال منى
جاى تسلم عليا
نيتك برضه تسلمنى

ما يهمنيش يا مصر برضك ح أوهبك عمرى

(°)

مصر جنبى ف الميدان من غير حرس إيديها على كتفي وطالعه من صوتى البرىء كلمه ماتعرفش الخرس مصر ضحكه ف الميدان على كل وش ما عادش فیه تزویر ولا عاد خلاص غش ولا يسرطن مزارعنا مبيد رش ولا مخبرح يندس ف دفاترنا ويحبس كل أحلامنا ويهرب بالحواس الخمس

(7)

مصر شالت ف الميدان عقاد الفل عقده ورا عقده تنفكي يا قيودي وأزيح بإيدى عقود الذل مصر شالها الليلادي وردي شافت هناك ف قلب الميدان ولدى صدره کان مبری بدبيب السل اتنسم الحريه ع الحياه تاني كان بيطل أنا مش وحيد في الميدان أنا واحد معاه الكل

(Y)

أنا في الميدان وانت مش بره لو أنى مت أنت ح تحضن الثوره إسكندرانى جنب بنهاوى سويسى فوق كتف دلتاوى صعيدى ومحلاوى أسمر وقمحاوى واللغوه مصراوى الكل غنى غنوة الثوار ماعادش فيه شيء يخوفنا خلاص خلاص

با عينى على موتك «وبعد فتره من الثوره»

لسه ديك الفجر متأخر ف الأدان لسه نور الصبح ما فتحش البيبان لسه فيه دمع ف عيونك يا بلادى لسه فيه دم لشهيد فوق تراب الأرض ناشع لسه فيه مدنه وجوامع خايفه من صوت الأدان

أنا كنت فاكر يومها إن النيل رجع لى الدم كان ع الأرض الدم كان ع الأرض

طلع الشهيد للسما فاتهولى يضحكلي ما عادش فیه زنازین ح تحبسنی ولاعاد هناك ضلمه تخوفني كنت فاكر النور طلع أتارى حلمي كان مقسوم ريح طيبه وريح سموم سما صافيه وتانيه مليانه بغيوم دم الشهيد اللي ضحك زی کان مخدوع يا عيني على موتك وانت شايف ف الحقيقه خروم مين اللي انخدع دمك واللاريقي اللي جرى ع النيل ما عدتش أعرف مين اللي صحى الموت تاني ف عيوني جلدى كان الكفن وليلى خاف م الليل يا عينى على موتك

وانت طالع فوق كل اللى حضنوا ف بعض كل اللى باسوا الأرض طالعين وراك بالدور.

أسراب طيور مكتوب عليها الغربه كل المواسم هجره الصيادين أبريا مين اللي فرع الطلقات وكسر الكاميرا لحظة رجوع الحلم للفقرا الصيادين أبريا مين اللي علق شماعات الخوف تاني ف دولابي مين اللي قال على قلبى إرهابي وحدفني بالمولوتوف الصيادين أبريا وأنا القتيل _القاتل أنا اللي هربت المدافع

وبكيفي شميت القنابل الصيادين أبريا یا بلدی حاکمینی دمي طالع فوق

والأرض مش خضره یا عینی علی موتی يا عيني على موتك کان نفسی پرسم بکره كان نفسه يرسم بكره 108

قصايد قصيرة

تعبير

حصة التعبير ومدرس العربى الغبى علمونى إزاى ما أقولش!!

کورس

باعلن ضيقي من تصقيف الجمهور في الأوبرا للمطرب ناسيين عن غفله أصوات الكورس المدبوحه فداااااء الغنوه. 112 |

مزيكه

مزك ف حزنك بس بالراحه الدنيا مش عدوده والضحكه مش فضاحه وما دمت ولا بدح افتح معاك الجرح واقفله بالراحه.

قهر

يا نخل يا عالى القهر عكر ميتك شربت جدوعك لاجل بطنك ترتوى فانحنیت!!

محطله

لما القطر يسافر بيا يقطع مسافات بين رمشك وعنيا أبص ورايا والقانى والقانى لسه قاعد مستنى ف محطة روحك.

نوتــه

إيقاع الغنوه مش دافى الأن قلبك طبيع النوته! طبيع النوته!

ملاميح

اللى ف عنيكى ملامحى ملامحى بس تنقصها الحياه!

سلسبيل

البحر شیال الهموم ما عادش یخشنی من یوم عنیکی النیل محت حزنی وعبتنی میه سلسبیل

118

المدنوى

پ وهوش پعلیس ف روحی وتسکن حروقی 7
- ميت م المصحك ك
- نـخلايـة الـبـيـر ا
- أبسويسا 15
- شافت أبسرها في المنهام 12
- العصايا شايله ريحتك 25
- إبراهيم أبو شريكو 29
- الحاجة تنقية 35
- جسمسرة قسلب بسره الأوطان 39
- حسان الحسلم مسرمسحش 43
 47 القامر أحسن منك
- تـــــــــــ
- وبكل ضعفى اتسندت عليكى55
- يستبل ريق المسراكب وأنسطفي59
- قلبى بيكره المشرطاك

پ حوادیت وطن بهعلن حونه ف حروفی 65
67 بحسلا ،
71
- وليليعسرب المعسرا
- - بــورنــو بــبلاش
- خــالص أحــزاني ٢٥٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠
- المصوره وخلفية المصوره
٣ السغلابه
- روباہیکیا
- أنا في المسدان وانت مش بره 99
- يا عيني على موتك
ي قيميايد قعييرة 109
- تـعـــــــــــــــــــــــــــــــــــ
- كــــورسورس
- مـــزيــکه
ـــــــــــــــــــــــــــــــــــــ
115d-b
- نـــوتــه
- مبيلامسيح 711
- ســــــــــــــــــــــــــــــــــــ

للتشرفي السلسلة:

* يتقدم الكاتب بنسختين من الكتاب على أن يكون مكتوباً على الكمبيوتر أو الآلة الكاتبة أو بخط واضح مقروء. ويفضل أن يرفق معه أسطوانة (C.D) أو ديسك مسجلاً عليه العمل إن أمكن.

* يقدم الكاتب أو المحقق أو المترجم سيرة ذاتية مختصرة تضم بياناته الشخصية وأعماله المطبوعة .

* السلسلة غير ملزمة برد النسخ المقدمة إليها سواء طبع الكتاب أم لم يطبع .

صحر موذرا فی سلسله

ا- قوارب الشمع
2- عنقود حياه أحمد خطاب
3- برق طالع للسما محمد عبد الخالق
4- نقوش حول جداريةدعاء إبراهيم
5- فوضى مُعلَنَة شوكت المصرى
٥- كتابوت يسعل بشدة يوسف شعبان مسلم

رقم الإيداع، ١٢٠٣/٣٤١٩ الترقيم الدولى، 3-213-178-978-978

شركة الأهل للطباعة والنشر (مورافيتلي سابقاً) ت. 23952496 - 23904096

بنشوف القمر أحسن منك



أحمد عبد الحكم

يجمع هذا الديوان على اختلاف قصائده نفس شعرى واحد. تتسم ببساطة اللغة وتوغلها في الثقافة الشعبية، وتداخلها مع الحس الصوفي، كما يحمل روحا واحد، وتمسك القصائد بتفاصيل دقيقة تدخل القارئ لقلب مشاهد شديدة الإنسانية، وذلك كله في بناء فني متماسك، يؤكد امتلاك متماسك، يؤكد امتلاك حددة

Bibliotheca Mexandrin 1245740